



# Tir Yimym

www.tiryimim.in

Regd. No. RNI. NAGAAO/2004/13113. Postal-NE/RN-717.

e-mail : tiryimim@gmail.com

TAPAK 8

Yangia anidakangma :



Tir Yimym



tiryimim@aolima



tir yimym

TAPAK 7



## World Para Championships: Deepthi-i 400m nung gold angu

## Helicopter tsükokdak Iran Tir Ebrahim Raisi asüba jangjaogo



VOL. XXI ISSUE NO. 218 (ADOK 218) DIMAPUR SANGTENNÜ (TUESDAY)

MONUPII (MAY) 21, 2024

₹ 5.00

## Iran President Raisi helicopter tsükokdang asü

New Delhi, May 20, 2024 (Agencies): Deobarnü East Azerbaijan province nung atalokba helicopter lendong nung Iran President Ebrahim Raisi süogo ta Iran media-i Hombarnü metetdaksü.

Iba helicopter nung Iran President Raisi aser foreign minister Hossein Amir-Abdollahian na mena liasü aser tenem aika aliba nung sama.

Iba helicopter tsükokba tesem angudang mena alirtem shinga taküm maliasü ta Iran state television-i ashi.

Iran nung Supreme Leader Ayatollah Khamenei-i anogo pungunü 'public mourning' alitsü metetdaksüogo.

Raisi asüba osang angashiba sülen Gulf linüktem, India, Afghanistan, NATO aser EU ajanga asükhu lemsatepba osangtem metetdaksüogo.

Iran sorkari anogo 50 tsüingda election magidang vice president Mohammad Mokhber (68)-ipresident inyaka atatsü shimogo. Maneni parnokisa Iran nung top nuclear negotiator Ali Bagheri-i acting foreign minister inyaksü shim.

Iran military chief of staff Mohammad Bagheri-ia iba tatalokba bushisüingdangtsü atema 'high-ranking committee' ka tentetsü tetuyuba agütsüogo.

India-i anogo ka ' State

Mourning' sangoktsür New Delhi nung Iranian Embassy-i Iranian President Ebrahim Raisi, Foreign Minister aser tongti ketdangsurtem asüba atema wako tom nung atsüzükogo.

India sorkaria tasürtem nem tetushi agüja May 21 nü linük ajungalen state mourning alitsü telemetba agiogo.

Iba anogo linük wako tom nung atsüzüksü aser official entertainment kecha malitsü ta Ministry of Home Affairs (MHA)-i metetdaksü.

Iran President Raisi ya Azerbaijan semdang meyipa aodang Tabriz city nung pa mena aliba helicopter tsükok.

Prime Minister Narendra Modi-i Iran President Ebrahim Raisi asüba atema mangyimba metetdaksüogo.

Raisi-i India-Iran tesentaktep tashi itdaksütsü atema tongti shilem agiogo ta PM Modi-i ashi.

"Islamic Republic of Iran President Dr. Seyed Ebrahim Raisi ajungbena asüba atema jashir aser aoksar. Pai India-Iran tesentaktep akangshiba nung shilem agiba teti bilemtetsü. Par kibong aser Iran nung den asükhu lemsateper. Iba tejashi mapang India-i Iran den külemi noktaker" ta PM Modi-i tanü metetdaksü.

## LS Elections Phase 5 nung vote enoktsür 57% liasü

New Delhi, May 20, 2024 (Agencies): Lok Sabha Elections shilem pungububa atema polling Hombarnü agiogo. Iba shilem nung state aser Union Territory 8 nung parliamentary constituency 49 liasü.

Taonung 8:00 ako tashi nung vote enoktsür 57.57% liasü ta Election Commission of India-i ashi.

West Bengal nungbo vote enoktsür 73% liasü ta ECI Voter Turnout App ajanga

metetdaksüogo. 2024 general elections shilem pungububa nung candidate ajak agi parnok 649 lir.

Lok Sabha menden 49 ya Uttar Pradesh nungi 14, Maharashtra nungi 13, West Bengal nungi 7, Bihar nungi 5, Jharkhand nungi 3, Odisha nungi 5 aser Jammu and Kashmir o Ladakh nungi kaka lir.

Tan shilem nung BJP aser Congress nung tongtipang lenir

aika toktepogo. Tanü Congress lenir Rahul Gandhi-i Uttar Pradesh kübok Raebareli nungi toktep. Külen, BJP lenirtem Rajnath Singh, Smriti Irani, Rajiv Pratap Rudy, Piyush Goyal, Ujjwal Nikam aser Karan Bhushan Singh nungeria toktepa liasü.

Tanü tetokteperitem rongnungsa LJP (Ramvilas) tanishir Chirag Paswan, JKNC tanishir Omar Abdullah aser RJD lenir Rohini Acharya nung dena lir.

## Karbi Anglong nung Naga tsür ka arem shititemi ajemset

Dimapur, May 20, 2024 (TYO): Hombar nikongdang 2:30 ako meta Karbi Anglong district nung arishi küm 42 tain Naga tsür ka arem shititem ajanga ajemset.

Daldoli forest nung atalokba lendong nung la kinungbo kanga

mejungi yirur anepaludar.

Iba lendong nung tasür ya Imsubena Lemtur ta jangjaogo aser la kinungbo Katoba Imsong Dimapur nung nija mozü ki ka nung anepaludar.

Apuani na ya Sunday bazaar

anasa aremi süng akoi aodang iba lendong atalok. Tanü nikongdang 4:00 ako meta Assam forest personnel, Assam police aser yimdaklirtm yaritepa tasü mang angu ta SDPO Bokajan-i ashi.

## Lawrence Miasalhou tepsetba anema Kohima nung lungkak ait



Kohima, May 20, 2024 (TYO): Lanur anati Mezomia Mechü Krotho (MMK) president aser Political Assistant to Deputy Commissioner Kohima, Kezhalelie Lawrence Miasalhou tepsetba anema Western Angami nungeri Hombarnü Kohima jila nung lungkak aitba sentong ka agiogo.

Kohima village nungi Neizosetuo Kire (24) aser Khrietsonyü Whuorie (25) nati Honibar nikongdang Phoolbari nung traffic tsütsü mangatetep ka adokdang asür Miasalhou dak azük.

Iba tatalokba sülen Miasalhou ya Oking Hospital-i anir ao aser Deobarnep asü. Yashi nikongdang pa tasoyim Mezoma nung pa den asüpila sentep sentong agiogo.

Kohima Police-i asangur ana pua lir ta metetdaksüogo.

Miasalhou tepsetba atema tejashi nung Angami telok balalai yaritepa Western Angami Youth Organisation (WAYO)-i lungkak aitba sentong agi.

Parnok Paramedical junction nung adenshi aser banners o placards amer Phoolbari tashi jaja.

Lungkak aiteritemi "Respect the elders", "Wrestlers or killers", "Don't grant bail", "Justice delayed is justice denied" amala tezülubatam amer shilem agi.

Phoolbari nung WAYO president Neitolie Khrietuo

Peseyie, Western Angami Public Organisation president Kepelhoutuo Chüsi, Southern AYO president Metekhrielie Mejura, Chakhroma Youth Organisation president Seyieneilhou Keyho, Northern Angami Youth Organisation vice president Kevizelie Pienyü, AYO president Kesosul Christopher Ltu aser MMK general secretary Khrielievü Chüsi nungertemi o jemi.

Pamoki iba tatalokba khukhua aitsü aser aibelener nem tapet temerenshi agütsütsü takhangba agütsü.

O jembirtemisa tasür kibong den asükhu lemsatep aser WAYO pusema temeten mangu tashi noktaksü metetdaksü.

Iba sentong agiba sülen WAYO aser MMK ketdangpurtem Deputy Commissioner Kohima dangi oa memorandum ka agütsü.

May 18, 2024 nü Phoolbari, Kohima nung lanur ana-Neizosetuo Kire aser Khrietsonyü Whuorie nati Kezhalelie Lawrence Miasalhou tepsetba atema temulung raksar ta WAYO memorandum nung shia lir.

Naga sobaliba ama lanurtemi aibelen dang taintemi metongshitsür ajisüaka lanurtemi tashiyim mapa inyakdang tain ka taküm samatsüba ya kodanga mebilemba mapa ka lir aser

WAYO-i iba tatalokba khukhua aitsür ta memorandum nungsa shia lir.

Ozüng amertemi aibelener ana aputsüla aser özüng kübok ken o benoker tatishitsü asütsüsa merenshitsüla ta WAYO-isa ashi.

Aibelener ana nem bail temelaba magütsütsüla aser kija mesüra telok kari dang tena bail nung anizüksü merangra tarutsü tatalokba ajak asoshi parnoki tebilemtsü abentsü ta WAYO-isa memorandum nung shia lir.

"Kohima DC-i asür kibong den mangyimba lemsatep aser pa PA Miasalhou asüba atema temulung raksaba metetdaksüogo. Pai ibe ken o süoki ia agütsü aser tekaratiba nung temeten agütsütsü nangzükogo" ta WAYO president Peseyie-i osangbener dang ashi.

Lungkak aiteritemi Police Station-i orr aibeleneritem yimjak nung sayutsüla ta takhangba agütsü saka Western Angami lenirtemi parnok mesüzükogo ta Peseyie-isa ashi.

Angami Students' Union, Nagaland Dobashi Association, Kohima Village Youth Organization, Angami Women Organisation, Angami Sports Association aser Kohima Village Council-i Kezhalelie Lawrence Miasalhou asüba atema mang ayimba den pa züksetertem aitsüba metetdaksüogo.

## Nagaland sorkari tzüingluruwa mongpu atema renemshir

Kohima, May 20, 2024 (DIPR): May 20, 2024 nü Chief Minister aser NSDMA Chairman Neiphiu Rio menden ser state-level monsoon preparedness senden ka menogo.

Iba senden nung state department temi Nagaland nung tzüingluruwa mongpu atema renema alitsü jembitep.

"Tzüingluruwa mongpu atema renema nung senotsü nüngdaker aser state sorkari district administrations nem emergency funds lezmüksütsüla. Iba senotsü teyari ajanga tzüingluruwa dak sendakba lendongtem nung yariteptsü" ta Chief Minister Neiphiu Rio-i ashi.

"Iba mapa nung Public Works Department (Roads and Bridges)-i tongtipang shilem agir. District shia nung lendongtsüdong nung amshitsü atema JCBs (excavators) renema alitsüla. National Highways & Infrastructure Development Corporation Limited (NHIDCL)-ia drainage systems, Hume pipes aser culverts ajunga sadema lapoka ayutsüla" ta pai ashi.

"Tzüingluruwa sülen relief efforts aser disease management nung department tem tsüingda amalitepa inyaksüla. Tebilemtsü ajuruba mapang civil society

organizations-i tongtipang shilem agir anungji taruba sendentem nungbo parnok dendaksütsüla" ta CM Rio-isa ashi.

"Agriculture Department-i aluyimer nem mapang shitak nung quality seeds agütsütsüla aser Power Department-ia power supply nung timtem ajurudang inyaksü asoshi renemtsüla" ta paisa ashi.

CM Rio-i Chief Secretary dang district ajak den video conference agütsü aser June tetenzüklen senden ka mena district-level preparedness meyipa reprangshitsü tetuyuba agütsü.

Iba senden nung Minister G Kaito Aye (PWD R&B), Minister P Paiwang Konyak (Health & Family Welfare) aser Minister K Tokugha Sukhalu (Food & Civil Supply, Legal Metrology) nung den Chief Secretary J Alam-ia parnok tebilembatem lemsatepa liasü.

Senden nungsa Joint Chief Executive Officer NSDMA Jhonny Ruangmei-i 'Monitoring and Forecasting of Monsoon 2024' report lemsatep.

PWD (R&B), CD & SDRE, Food & Civil Supplies, Health & Family Welfare aser NDRF Department temi infrastructure maintenance reports agütsü aser presentations ajanga parnoki maparen renema aliba lemsatep.



### DPS Dimapur nung kaketshir temi takok anguba benjong



**Dimapur, Monupii/May 20 (TYO):** Delhi Public School, Dimapur nungi AISSCE examination nung takok angur nem tenüngsang agütsüba sentong ka Hombarnü agia liasü. Iba sentong ya Delhi Public School, Dimapur atema tejak tentetba mapang ka liasü, kong kaketshir temi meranga zünga takok anguba sayur aser school-i kaketshirtem tajungtiba kumdaktsütsü asoshi bendanga agütsüshir.

Iba sentong ya school indang assembly hall nung agi, kong kaketshir, tsürabor, tesayur aser school indang board züngsemtem dena liasü.

Taküm iba tatidang nung kaketshir 157-i agütsüba nung ajaki takok angur aser parnok rongnungi 1st Division nung kaketshir 154 aser 2nd Division nung kaketshir asem liasü.

School nung Humanities stream-i Ruokuosenuo-i marks 95.2% nguteta tematiba jenjang

tongtet, aser Science stream nungi Aryan Jain-i 94% aser Commerce stream nungi Kudukho Pukhomai-i 93.8% nguteta liasü. Kaketshir 87-i marks shilem 80 dak tema ngutet aser parnok ajak nem tetushi agütsüba liasü.

School topper nem senpet sen 25,000 aser marks shilem 90-94.2 tsüngta angur kaketshir 20 nem senpet sen 15,000 agütsüba liasü. Marks shilem 80 aser tema anguba kaketshirtem nem takok kulizüng kaket agütsüba liasü.

Kanga junga takok ngutetba temaitsü Geeta University, Panipat, Delhi NCR ajanga Ruokuosenuo aser Kudukho Pukhomai na nem higher education atema Tuition Fees nung scholarship 100 shilem kulizüng kaket agütsüba liasü.

Principal Anurodh Chitra-i takok angur kaketshirtem nem tenüngsang agütsüba mapang, tajung akumtsü asoshi meranga inyaktü aser tamakok

ajurudang tezü danga malitsü tongtipang ta ashi.

School indang local management aser Delhi Public School Society tenüng nung school indang Pro-Vice Chairman, Dr Aotoshi-i jembidang, kaketshir tajungtiba nung anitetsü asoshi tsürabor aser tesayur lungjemer inyakba atema pelaba lemsatepa liasü.

Tanü takok anguba dang nungi tajungba asüng takok angutsü school temulungtetba lir, anungji kaketshir temi tetsükdaktsü ajuruba kokteta tajung akumtsüla, ta pai ashi.

Pai kaketshirtem dang DPSD indang ambassador kaka akumtsü aser o agi masü saka mapa agi school indang tashi sayutsü ajungshia liasü.

Iba sentong nung school chairman S.I Jamir, treasurer Maronen, Dr. Aotoshi aser Anurodh Chitra nungeri kaketshir nem sempet agütsüba liasü.

### Medziphema nung Accounting, Auditing & Taxation workshop tenzükogo

**Dimapur, Monupii/May 20 (TYO):** Department of Cooperation ajanga CTC Medziphema nung May 20, 2024 nü Accounting, Auditing and Taxation indang workshop tenzükogo, koba May 24, 2024 tashi alitsü.

Tesemdanger tongti ka iba sentong nung jembidang department ketdangsürtemi pei mapa temulung lema inyaktetsü mechi iba ama tongtipang sentong ayongzükba atema Under Secretary, Department of Cooperation, Wacy Kent-i department nem tenüngsang agütsüba liasü.

Grassroot level nung nüburtem nem training agütsütsü aser angatetdaktsütsü aser yimdakyimtsüng nung aliba nüburtem asoshi temelenshi tajung bener arutsütsü atema Cooperative awareness agütsütsü nüngdaker, ta pai ashi.

Iba ama sentong ayongzükba ajanga state nung Cooperative Movement temaba jenjangi ajungkettsü, ta paisa ashi.

Sentong tenzükba Finance Trainer, National Cooperative Union of India (NCUI), New

Delhi, Anurag Dang ajanga iba workshop nükjidong rateta ashi aser Addl. RCS, Bendangla Longkumer-ia tajungshi o tatsüka jembia liasü.

Iba sentong nung 'To equip participants with the necessary skills required to prepare and maintain accurate accounting records', 'To enable participants to effectively prepare and interpret financial statements', 'To provide participants with a comprehensive understanding of relevant provisions of the Goods and Services Tax Act, 2017, as applicable to the state of Nagaland', 'To equip participants with the necessary skills required to conduct audits of Cooperative Societies' aser 'To enhance participants auditing skills by providing insights into legal provisions governing audits, audit classification of societies using CAMELS rating, audit reporting etc' amala onük nungi workshop ya agir.

Iba sentong nung menden Deputy RCS & Training Coordinator, Bharati Chhinal liasü aser iba workshop nung ICS, SRCS aser ARCS 63 adenshia shilem agitar.

### 77th Cannes Film Festival nung Naga nunger indang docu-film ka saya



**Dimapur, Monupii/May 20 (TYO):** Academy, Oscar aser Golden Globe Award ngua ken mejemer Padma Bushan Dr. A.R. Rahman-i 'Headhunting to Beatboxing' nüngja agütsür aliba feature documentary ka indang mezüng noksa aser teaser saytsü.

Iba sentong ya France nung 77th Cannes Film Festival nung agia liasü. Rahman den Advisor to Chief Minister and Chairman, Investment & Development Authority of Nagaland (IDAN), Abu Metha aser Chairman, Task Force for Music & Arts, Theja Meru nungeri iba documentary ya ashi.

'Headhunting to Beatboxing' ya Rohit Gupta-i direct asü aser AR Rahman-i yanglu, koba putu balala ajanga kensü ola melenshia aruba indang shisadanga lir.

Iba feature documentary indang jembidang, "Ken nung nübur melenshitsü aser sendakteptsü tashi lir. 'Headhunting to Beatboxing' ya iba lima nung yimya balala ajanga meimchir lungjemdaksüba universal rhythm benjongba lir," ta AR Rahman-i ashi.

"Iba film benjong tenzüktsü yongya liasü aser Cannes dang tajungba kechi ali, kong cinema benjonger aser yangi iba film

indang mezüng sangdonger," ta ashi.

State nung akhi alemli tekolak bushiba mapang nungi musical renaissance tashi iba documentary ya ajanga tereprangertem musical anthropological odyssey tali tejangjaba angatetsü, ta ashi.

"Hornbill Festival nung shilem ka ama AR Rahman-i Nagaland semdangba mapang iba film indang apitet. Yangji shilem agitsüla ta onoki meteta liasü. Iba film ya nisung balala, talisa TaFMA lungjemer yangluba lir, aser director Rohit Gupta-i kanga junga renem," ta Abu Metha-i ashi.

Shidakba 'heroes' ji Nagaland nungi kentener tem lir, shirnoki akhi mapang indang otsü tem ashi aser parnok ken ajanga asen lanurtem mangdang sayur.

Iba film sayaba sentong nung bendang lima balala nungi arua aden aser iba mapang Metha-i Nagaland indang tongmelang agi rateta ashi.

Kin aika meyoktepa aliba Nagaland ya akhi tejen yimsü-yimbong, sobaliba balala indang tatishitsü tajung ka lir, kong kin balalai küm tepiyong benjong balala ayongzükba munga arur, ta Metha-i ashi.

"Nagaland dang Land of Festivals ta ajar aser küm

tepiyong yamaji benjongbentsü balala munga arur tatembang amai Hornbill Festival ya amunger," ta pai ashi.

Iba film semzükba nung yaritepa atema Chief Minister Neiphiu Rio, Union Minister Anurag Thakur-i anir Central Ministry of Information & Broadcasting dang Metha-i pelaba shisem.

Maneni Nagaland den lungjemer shilem tajung agia yariba atema pai Dr. AR Rahman danga pelaba lemsatepa liasü.

Ajaki kanga jangja meteta aliba nübu tejen ka nem len anidaktsütsü ya Naga nunger lanur kentener asoshi maongka tajung lir, ta pai ashi.

Chief Minister Neiphiu Rio-i tanen makai yariba aser pa mangdang tajung akaba ajanga iba maparen ya inyaktet, ta Metha-i ashi.

"Iba film ya küm pogu nung yanglu aser ni atema temelenshi ka amai liasü. Akhi mapang nungi tenzükba tanü tashinung kentenba tsütsü temelenshi jenti lir aser aji ngua kanga süngmanger. Onoki meranga inyakba terepranger ngua kanga pelar," ta director Rohit Gupta-i ashi.

TaFMA Advisor Theja Merua iba sentong nung jembidang Nagaland nung aliba kentener tem dang pelaba lemsatep aser Naga nunger asoshi alizüng tajung ka asütsü, kechi aser alima dang Nagaland indang kentenmenü otsü tajung ashitsü, ta ashi.

Iba film nung executive producers Abu Metha, Adam J. Greig, Theja Meru, Rohit Gupta, Sheila Houlahan aser Rohhit Daas nungertem alitsü.

### AR-i Kashiram nung walkathon ayongzük

**Dimapur, Monupii/May 20 (TYO):** Awareness kar agütsütsü nükjidong nung Assam Rifles temi Kashiram Village, Dimapur nung May 19, 2024 nü walkathon sentong ka ayongzükba liasü.

Meri Life Amplification omen nung shilem ka ama Assam Rifles temi libajen wazüka ayutsü aser nüburtemi shilem agitsü atema awareness agütsüba liasü.

Iba sentong nung ketdangsür pezü, JCOs asem, ORs 38, kibong 78 aser tanur 45 arua

shilem agia liasü, koba yimtsüngtem ajanga jaja aser iba mapang libajen wazüka ayutsü tongtipang ta nüburtem nem awareness agütsüba liasü.

Parnok jajaba lenmang nung yimdaklir temi parnok pelashishia agizüka parnoka shilem agi aser libajen wazüka ayuba maparen temulung agütsüba liasü.

Awareness agütsüba den iba ama sentong yagi Assam Rifles aser nüburtem tsüngta tesendaktep tashi taitba akumer, ta sangdong ka ajanga ashi.

### Excise Narcotic Cell-i Chümou-kedima nung temesepba mozü apu



**Dimapur, Monupii/May 20 (TYO):** Chümoukedima district kübok 6th Mile area nung temesepba mozü yokyayokchiba osang lazükba nung ajemdaker Excise Narcotic Cell duty party temi meita aoba mapang Maram Bazar, Senapati, Manipur nung alir SP Khamkhio'er jabaso SP

Mesiingaolou ket nungi soap boxes 69 nungi Sunflower (Heroin) tuozük gram 759 shi nguteta liasü.

Item temesepba mozü ya pa indang trolley bag nungi nguteta liasü.

Iba nisungba ya idangjisa apu aser NDPS Act 1985 kübok ken o benoka bushisüngdanga mapang lir.

Duty party ajanga temesepba mozü tebilemstü aser ozüng alema shibelenba azüoktsü atema tanen makai meranga inyakba atema tenüngsang agütsür, ta Dy Commissioner of Excise (NC) S Phyobemo Kikon-i sangdong ka nung ashi.





May 20, 2024 nü Bengaluru nung JD(S) party nung züngsemtemi Congress lenir ana-D.K. Shivakumar aser L.R. Shivaram Gowda na anema longkak aitdang tangokba noksa nung angur. Gowda-i taoba mapang Ato kilonser, H.D. Deve Gowda anema jembiba atema JD(S)-i longkak ait.

### Chhattisgarh nung gari ka tsükokba lendong nung nisung 15 asü

**New Delhi, May 20**

**(Agencies):** Hombarnü Chhattisgarh state kübok Kabirdham district nung khu abenba mini-truck ka lungreni lua tsükokba lendong nung nisung 15 asü aser nisung 8 kanga mejungi yiruogo, ta osang ka ajanga metetdaksü.

Iba lendong nung asürtemji tetsür 14 aser tebur ka liasü.

Aayangertemji arem ka nung tendu tou (biri moko alepba tou) yataba sülen mini truck ka nung kidangi meyipa arudang gariji Bahpani yim

anasa tsükok. Iba lendong atalokba sülen police team ka iba tesem jagi oa kümzükbä maparen inyäk aser yirua alirtemji anasa aliba hospital-i anir oa yaridar.

Iba osang angashia Chhattisgarh Deputy Chief Minister, Vijay Sharma-i X ajanga iba lendong nung asür kibongtem den mangyim jashi lemsatep aser sorkari takoksa angurtem nem senotsü teyari agütsütsü, ta metetdaksü.

"Kawardha nung pick-up gari ka tsükokba lendong nung

aayanger 15 asüba osang angashia jashir. Iba lendong nung asür kibongtem den ni mangyim jashi lemsateper aser yirua alirtem tekeraba nung aneptsü atema sarasademtsür. State sorkari achayanga local administration-i takoksa angurtem aser parnok kibongtem nem teyari agütsütsü," ta pai metetdaksü.

Chhattisgarh Congress Tir, Deepak Baij-ia X ajanga state sorkar dang takoksa angurtem nem tekeraba nung teyari agüjjang, ta takhangba agütsü.

### Gujarat nung ISIS züngsemtem südi ta melung melemi nisung 4 apu

**Ahmedabad, May 20**

**(Agencies):** Hombarnü Gujarat state kübok AT Ahmedabad airport nung ISIS kiralongrartem asütsüa akok, ta melung melemtemi nisung pezü puogo, ta Gujarat Anti-Terror Squad (ATS)-i metetdaksü.

Par pezüpronglaji Sri Lanka nungertem lir.

Par pezüji arrshi küm 35 Mohammad Nusrat, Mohammad Faarukh (35), Mohammad Nafran (27) aser Mohammad Rasdeen (43) nungner lir, ta jangjaogo.

Par pezü Amongnü anepdang Sri Lanka yimtiba, Colombo nungi tayimtsü ka ajanga Chennai yimti tonga aru aser kasa aonungjisa 8:00 ako nung tayimtsü ka ajanga

Ahmedabad yimti tonga arua liasü.

Hombarnü Ahmedabad airport nung melung melemtemi nisung pezü apuba sülen airport nung security akangshiogo.

Gujarat ATS sepaitemi par pezüpronglaji mejangjaba tesem kati anir aoba sülen asüngdangyadar, ta osangbenertem metetdaksü.

Indian Premier League (IPL) qualifier aser eliminator games asayatsü atema team asem Ahmedabad airport tonga arutsü mapang anasa melung melemtemi nisung pezüji puogo.

Taküm March ita nunga

International arrtsü anasa India nung ISIS kiralongrar lenir ana apu. Tenaji Bangladesh nungi arrtsü adena aitba sülen apu.

ISIS züngsem anaji ka Uttarakhand kübok Dehradun nung alir Harish Ajmal Farooqi alias Harish Ajmal Farukhi aser ka Haryana kübok Panipat nung alir Anurag Singh alias Rehan lir ta jangjaogo.

Yaküm December ita nunga National Investigation Agency (NIA)-i Maharashtra aser Karnataka na nung tesem 44 mita aoba mapang nung ISIS kiralongrar 15 pua liasü.

Yaküm October ita nunga Delhi police special cell kati NIA-i mapang talangka nungi bushia aliba ISIS kiralongrar Shahnawaz apu.

### India-i Iran Tir, Raisi nem akhüm agüja anogo ka mangyimtsü

**New Delhi, Monupii/May 20**

**(Agencies):** Hombarnü Union Home Ministry-i, Iran Tir Ebrahim Raisi nem akhüm agüja India-i May 21 nü mangyimtsü, ta metetdaksü.

Hombarnü East Azerbaijan province nung helicopter tsükokba lendong nung Raisi asü.

Pa nem akhüm agüja India tesem ajaklen linük wako tom nung asongtsü aser iba mapang nungji official sentong kecha magitsü, ta ketdangsertemi metetdaksü.

Ebrahim Raisi helicopter tsükokba lendong nung asüba osang angashiba sülen Ato kilonser, Narendra Modi-i X ajanga, "Iran Tir Dr. Seyed Ebrahim Raisi lendong nung

asüba osang angashia kanga jashir. India aser Iran na tsüngda tesendaktep tashi itshitsü atema pai inyakba mapatem kodanga mamatoktsü. Ni par kibong aser Iran nung nüburtem den mangyim jashi lemsateper. Tang ama mapang nung India-i Iran nungiter," ta lemsatep.

Iran Tir, Raisi den külemi foreign minister aser ketdangsertem mena aliba helicopter ji East Azerbaijan province nung tsükok, ta ketdangsertemi metetdaksü.

Home ministry nung otongdar kati, Iran Tir Syeed Ebrahim Raisi aser foreign minister Hossein Amit-Abdollahian na helicopter tsükokba lendong nung süogo, ta metetdaksü.



Mumbai, May 20, 2024: Hombarnü Lok Sabha election shilem pongububa agiba anogo nung Mumbai nung polling station ka nung arrshi küm 112 tantsür, Kanchanben Badshah-i vote agütsüba temaitsü sayudang tangokba noksa nung angur.

### Ni minorities anema o ka danga mejembi: PM Modi

**New Delhi, Monupii/May 20**

**(Agencies):** Ato kilonser, Narendra Modi-i, pai kodanga minorities anema o ka danga mejembi, aser BJP-ia tanü dang masü saka kodanga minorities anema meinyak, ta metetdaksü.

Amongnü interview ka nung jembidang Modi-i, Congress-i linük temzüng kübok secular anema maneni inyaker aser election nüboyimba mapang pai jembiba otemji opposition party temi vote bank atema minorities mesüzükba anema jembiba jungkai adoktsütsü nükjidong nung jembiba otem lir, ta metetdaksü.

Nai jembiba otem ajanga minorities arendaker, anungji naia iba nungji kechi ashir? ta asüngdangba langzüdang Modi-i, "Ni minorities anema o ka danga mejembi. Ni Congress indang vote bank politics anema dang jembir. Congress-i linük temzüng alema inyaker, aser ni iba atemaji dang jembir," ta ashi.

Ato kilonser Modi-i, "B R Ambedkar aser Jawaharlal Nehru na densema linük temzüng yanglurtemi tamangba yimsü nung ajemdaker reservations kecha malitsü atema telemtetba agia liasü, ajisüaka tangbo nenoki (Congress) iba nungjagi tejak shishir. Item jungkai adoktsütsüji

kü teinyaktsü mapa lir. Iba mapang nungjibo Constituent Assembly nung ozü party nungjibo züngsem ka danga maliasü," ta ashi.

Paisa, "Congress-i mesüzükba lenmang nung jajar. Ni melung asüba lenmang nung jajar. Parnok politics ji mesüzükba lir. Kü politics ji 'sabka saath sabka vikas' lir. Onoki onok den ajak züngokner. Onoki sensotem shinga bendanga mezüngshir," ta ashi.

Congress-i atangji Hindu nungner rongsen Muslim nungner nem agütsütsü, ta nai bilemer asü mesüra ibaji nüboyimba dak sendakba nung jembiba o dang?, ta asüngdangba langzüdang pai, "Ibaji ni yamaji bilemba indang masü. Kuli kecha makai nüboyimbaji temenen. Ni kodanga iba ama temenen memena mesüra memenaner," ta ashi.

Paisa, "Congress manifesto sayaba anogo nung ni iba manifesto ji Muslim League indang lir ta shiogo, kasa anogo nungjisa Congress party-i ibaji tai ta kuli sayutsüla liasü aser 'Modi, ibajibo shidak masü' ta ashitsüla liasü," ta ashi.

"Ajisüaka parnoki ola madok, anungji ni India nungertem nem ibaji angatetdaksütsüsa aküm," ta paisa shisem.



May 20, 2024 nü Hyderabad nung kanga tatsük asüba agi gari nung senzürtem atema Greater Hyderabad Municipal Corporation (GHMC)-i Liberty traffic signal nung sü meyangja aliba noksa nung angur.





## TIR YIMYIM YIMOBILEM (EDITORIAL)

DIMAPUR SANGTENNÜ, MAY (MONUPII) 21, 2024

### Alima Tatsükba Akümer

- Tangsen Lemtur

**A**lima nung temperature 2°C tali tura India tesem aika nung nisung ali majungtsü, ta study ka ajanga bushitetogo. Alima puti otsü nung 2023 küm temperature teimtiba atu aser küm shia teimba atutsü südi. Tawa India nung agiba survey ka nung shilem agir shilem 85-ibo climate change ajanga kongshiba parnoki ajangshir, ta shiogo aser iba nungjagi shilem 30 dak temaibo kanga tatsük, tzümetsüng mesüra climate change dak sendakba kuli balala ajanga parnoki tesem melenshia alir mesüra tesem melenshitsü bilemdar, ta shiogo. India nung temperature teimtiba atubaji 2016 küm May ita nung Rajasthan state kübok Phalodi district nung temperature 51°C tashi atuba liasü. Taküm-a tang tashi nung India nung temperature teimtiba atubaji anogo ishika jakdang Delhi kübok Najafgarh nung 47.8 degrees Celsius tashi atuba liasü aser ano maneni atutsü südi. 2050 küm tashi nungbo India nung nisung crore 14.83 bo climate change agi kanga mejungi kongshiba tesemtem nung alitsü, ta mongintemi asadangteta lir. Tsüngremi yangluba limatem (planets) rongnung nisung taküm alitsü akokba limaji asenok aliba lima ya dang. Nütsüng billion 8 dak tema den külemi tanga shiruru molulisem ama mezüngdangteti aliba lima nung tzü-mopung menenba aser alima tatsükba akumba ajanga meimchir taküm melitetsüsa akumba agi linük balala nungi lenirtemi anir asen lima kümzüka ayutsü atema mapatong balala benoka inyaka arudar. 1970 küm nungi tenzüka küm shia alima nung nüburtemi April 22 anogo ya 'Alima Anogo' (Earth Day) ta shiteta amonger. Yamaji taküm-a taoba ita iba anogomong nung 'Planet vs Plastics' omen nung ajemdaker sentong balala ayongzüka tzü-mopung memenendaktsüi alima wazüka ayutsü ajungshitepa mongogo. Küm aika tejaklen US nung industry balala lapoka aoba ajanga tzü-mopung menenba agi nisungtem asoshi timtem-lendong bener arutsür, ta rajema US nung Senator, Gaylord Nelson-i alima memenendaktsüi wazüka ayutsübaji kanga rongdak nungdak ta apitet. Iba mapang nungji 1969 küm Santa Barbara, California nung totzü yimdokba ajanga taküm aika samaba aser tzü-mopung menenba ajanga teraksatsüba aser takoksa ngur lia, Nelson-i alima kümzüka ayutsü asoshi langkabosa inyaksüla ta apiteta liasü. Ajioda mesüngjemtetba tanela kati pa ajungshia pai külem yimten nung tenzüker kar ayongsemer America ajaklen tzü mopung memenendaktsüi alima kümzüka ayutsü asoshi tesayuba aser tangatetba agüja inyaksü tenzük. 1970 küm April 22 nü America nung million 20 shii tesem balala nung sentong tapu balala ayongzüka alima nung tzü-mopung menentsüsa mapatem kecha meinyaktsüla ta sangdongtsü tenzük. Alima tzü-mopung kanga menendaktsüba aser alima tatsükba akümba kulitem rongnung- totzü yimdokdaksüba, industry balala nungi adokba mokozü den tango tamajung, factory tapu balala nungi jana aser miim mozütem, arem tulu chidokba aser arem shiruru khasetba mesüra samayonga aoba densema lir. Alima tatsükba akumba tongti kuli rongnung kaji, anogo shia Industry teimba-teimba amenokba ajanga arem tulu chireptsüsa akumer; yamaji arem chidoka moapu tuluba-tuluba küma alima tatsükba akumer. Joko tesüiba küm 50 dak tali alima kümzüka ayutsü sangdonga inyakba agi alima tatsükba akümba terabo azüokteta tanü tashibo meimchirtemi tatsük tizükteter.

## OLEMSABANG

### Naga lima dak apet nüngjalok kar

- L. Kika Pongener.

(Yashi adok nungi...)

Lokti-tentet tali aliba lima (Land of Organisations and Unions) ta ajatsü tapet lir. Alu zünger nungi tenzüker teloktentet zünger-mezüngmai ka 'Union' tenzüka lir. Hau-niii...Lokti-tentet aliba ajanga lenmang aisu nung teyaritep aser temeimtepa lir-ko, saka tim dak tali tapu-tapu purateta tentetba ajanga kibong ajak küsa masüji, karbo kanga tim-atemer aser sensak tiai ayir. Kechiyong lokti-tentet ajakji saru-saji madenba kata mali. Ano lokti-tentet tali aliba yagi toktep-shitep aser meputepba ya tali adener. Ashiko, meilungibo asen lima nung...Sentsü tanak Union, Sentsü temesung Union, Tar talang Union aser Tar tatsü Union, Teyira-pur Union aser Tekongra-pur Union ... ta tenzüka aotsü sudi... joko itemji dang tenzüktsü anunga lir.

Ochimashi agi sunga aliba lima (Land of Corruption) ta ajatsü dalang...Aser iba tenung yabo India nungeri yakta nungi jaloktsüogo. State sorkar nungi tenzüker alua yimtsüng nung loktiliba tilatiba (Grassroot level) tashi nung ochishia inyakba aikabo mali, teimba ka ochimashi agi sunga lir. Tanga telokji khen oda toktsür mungdang aser arogo dena ochimashi agi sunga lir. Anungji ochimashi lima ta ajatsübaji tapet lir.

Temzüng-ozüng maka amai mebenshiba lima (Land of Out-law) ta ajatsü tapet lir. Tanu asen lima nung temzüng-ozüng tazüokba aser talenba kecha maka amai, pei sunutsü sua litepba lima ka kümogo. Kechiyong sorkar nunga yimsusur tazüngpuri anir aibelena inyaker, yimtsüng nung yimsusurtem-ia temzüng-ozüng nung aibelener, loktiliba ajak nung lennirtemi anir aibelener, arogo/mungdang nunga lennirtemi anir aibelener. Atangji, asen Naga lima ya Shitsü/Shingo rongnung topur tajungtiba koba-ang meshimtet amai kümadokogo.

Jaksa-jaklem lima (Land of Fashion) ta ajatsü kanga tapet lir. Asen Naga nungeri ya pei kibong aser jenjang dak malangba subosolemtsü subotsü jangratepba nuburtem teimba lir. Kidang tang sorotsü jangpong nung jang mali surnung, apen-suoshi nungbo senotsü tali-tapong endoker. Anuolen alir (Westerner) lima nung benshiba ajunga ajizüka benshisu meranger. Anungji jaksa-jaklem lima ta ajatsü kanga-sa tapet lir.

Azümesen aser chidiyungdi lima (Land of Lazy and Greedy) ta ajatsü kanga tapet lir. Mapabo meinyakner, saka chiyungtsübo shi-ango den dang chiyungnur. Aika kidangpo kecha maka sur yi agi meseper bangso-banglema o-bo tululu jembir. Anungji azümesen aser chidiyungdi lima ta ajatsü kanga tapet lir.

Sorkar nung temetongshitsür maliba lima (Land of Opposition-less Govt.) ta ajatsü tapet lir. Sorkar bangdak menden nung Tatar ajunga telok ka kümer tai danga tai-a ta ashir kata mali, tanishir tekolakba sulen tajung-majung ajak nung hau-hau ta anidakba lima. Anungji temetongshitsür kata maliba lima ta ajatsü kanga tapet lir. Jokorla... "Nagaland for Christ" ta masü... "Nagaland for Corruption"...ta dang ajatsü kanga dalang kümadokogo. Atangji, "Nagaland for Christ" ta ajatsübo kanga-sa taaktsüka kümadokogo.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## Port Moresby nung nisung 5,000 dak temai Khrista agizüka bapti



May 11, 2024 nü Papua New Guinea kübok Port Moresby nung aliba Ela tzüymküm nung baptiba sentong nung adenertem tangokba noksa nung angur.

**May 20, 2024:** Tawa Papua New Guinea (PNG) kübok Port Moresby nung aliba Ela tzüymküm nung Adventist pastor temi nisung 5,000 dak tema baptitsüogo.

Linük tesem ajaklen PNG for Christ evangelistic sentongtem agia arua sülen tatembangbuba anogo, May 11 nü nisung 5,000 dak temai Yisu Khrista agizüka bapti.

May 10 aonung Communications & AV team-i Ela Beach nungji PA system renema liasü aser May 11 anepdang ano mesangwai lia 7:00 ako nung baptiba sentong tenzüksü jelia Adventist Arogo züngsemtem aika adenshi tenzüka liasü.

Sentong ayongzükertemi, "Nisung 5000 dak tema baptitsü aser anüngdang matongdangsa baptibaji tembangtsüla, kechiyong iba mapangji suurbo tzü 'level' metsünga atutsü," ta metetdakja liasü.

Baptiba sentong tenzükdang

Arogo züngsemtem, baptitsüpurtem, tejaokertem aser Arogo lenirtem tzüymkümji sünga adenshir liasü.

Mezüngbuba nung pastor 12-i ketdangsa züngsem tasen akümtsüpurtem baptitsüadang regional Arogo nung lenirtemi loudspeakers amshia sarasadema liasü. Ghonda ana shi lirbo pastor 48-i ketdangsa baptitsü aser anüngdang 11:00 ako tashi nungbo baptiba sentong tongtibo tembanger liasü.

Papua New Guinea nung PNG for Christ 2024 evangelistic sentong aika agia aruba sülen tatembangbuba anogo nung baptiba sentong agi. Iba project atema Adventist World Radio, Total Member Involvement initiative, South Pacific Division & Papua New Guinea Union Mission, Adventist Church longjema liasü. Iba denji külemi local

Arogotemi linük tesem ajaklen Khrista osangtajung prokba nung shilem agia liasü.

Sentong ayongzükertemi ashiba agi, Tsüngrem O jembirtemi linük tesem 2,000 dak tema nung sayutsüngia aruogo.

April 26 nung tenzüka May 11 tashi agiba evangelistic sentongtemji alu aruhba mapatong ka liasü. Tatembangbuba anogo nung shilem agirtemi Arogo nung züngsem tasenpurtem pelaa agizük.

May 11 nü agiba sentongji Ela tzüymküm nung baptiba sentong tulutiba liasü. Iba sentong nung Arogo lenirtem, local Arogotem nungi pastor tem, deacon tem aser timsürtem aikati shilem agiba ajanga iba sentong takok ngua agitet.

Osangbener den jembidang Arogo lenir kati, "Iba ya tanela benjung ka lir. Iba ama tanela benjung ya onoki kodanga mengudang," ta ashi.

## ANO GO ABEN TSÜNGREM DEN

### Kanga Asangtsüla

- T.Ken 145: 1-13

Asenoki metetta aser memetetti Tsüngremi asenok lenmang aisü nung kümzük. Asenoki Pa tekümzük mapa asoshi Pa kanga asangtsüla.

Pa uluba asoshi asenoki Kibuba tenüng sangdi. Ken züluri ashir Pa uluba tatem maka. "Ni na uludaktsütsü, kü Tsüngrem, o chuba. Aser ni ne tenüng teti moatsütsü. Anogo shia na moatsütsü, aser ni ne tenüng teti asangtsü" (t.1,2). Tsüngrem uluba sanga asenoki teti tatem maka takümji indoktsü. Ano Pa ulubaji mebushimatsü. Asenoki ibaji asadangtsü makok. Asenoki pa lenden metong, talang aser tesadem aser tarok metettsü makok. Aser Tsüngrem ulubaji tebilemtetba lir. "Ne mapatem putu kati putu ka dang asangtsü, aser ne tesüngmangtsü mapatem indang ni shisadangtsü" (t.4,5). Asenoki taruba putu dang Tsüngrem uluba indang ashitsüla.

Idangji ken züluri Tsüngrem ajungba indang tenüng asang. Tekong 7 nung ashir, "Parnoki na kanga ajungba nüngsang jembiteptsü, aser ne Temeshiba indang pelashishia metetdaktsütsü (t.7)... Kibubai ajak dang ajunger aser pa temeim yimlibilem, pa mapa ajak madak lir" (t.7,9). Tekong 8 nung Kibuba taochi rasar. "Kibuba taochi aser yimlibilem lir; ain adoktsü mekara, aser yimlibilem tulu lir". Pa ain doktsü mekeraba nung nai pelar asü? "Parnoki ne yimli sentsüwangshi indang jembitsü" (t.11).

Asenoki Tsüngrem naroküm angajemtsü makok. Saka Pa shiba aser Pai asenok taküm nung kechi mapa inyak iba asoshi pa tenüng asangtsüla. Ni kümzükba asoshi Tsüngrem tenüng asanger. Pa uluba, Pa ajungba, Pa taochi aser Pa sentsüwangshi asoshi Pa tenüng sangang.

## Russia nung Orthodox Arogoi tanurtem nem sepai training agütsür



Yaküm November 4 nü Moscow nung National Unity Day amongdang Red Square nung Russia Tir, Vladimir Putin aser Russia Orthodox Arogo nung tongti Patriarch Kirill na tangokba noksa nung angur.

**May 20, 2024:** Russia nung Orthodox Arogoi Opalikha nung aliba Elisabeth Church nung tanurtem nem sepai training agütsü tenzükgogo; Ukraine den rara nung shilem agir sepaitemi arrshi küm 12 tashi tanurtem nem training agütsür, ta osang ka ajanga metetdaktsü.

Moscow region nung Krasnogorsk city administration indang website nung iba osang metetdakja liasü.

Sepaitem training ji arrshi küm 12 ser temapur tanurtem

nem angati agütsür. Hopta tatembanglen shia Opalikha nung Elisabeth Tenla ki anasa iba training agütsür. Raraba hadir amshitsü, sepaitem inyaksangshi metettsü aser mozü dak sendakba rajemdaktsütsü nükjidong nung tanurtem nem training agütsür.

Item traning sponsor asüba organization ROKOT -i, "Tarutsü nung pei lima kümzüktsüpurtemi sepaitem inyaksangshi metetba dang masü saka Moscow region

indang puti otsü metettsüla. Asen tsüraburtem aser otsüla-oboula nunger sobaliba tajung angazüktsü atema longjemer inyaktü kanga tongtibang kümogo," ta metetdaktsü.

Odintsovo aser Krasnogorsk nung tongti putir, Thomas-i iba training program atema moaja sarasademtsüogo aser Khristan putirtemi tanurtem dang pei linük meimba aser Russia puti otsü indang tesayuba agütsü.

Russian Orthodox Church kübok Moscow Patriarchate-i tamalena rara nung shilem agidaktsütsü atema Arogo züngsemtem shima liasü.

Ukraine Security Service-i ashiba agi, Russia Orthodox Arogoi St. Andrew's Cross ama nija sepai company tem tenteta rara nung shilem agidaktsütsü atema Arogo züngsemtem shimmoker.

Russia-i Ukriane amak tenzüka mapang nungi tenzüka MPROC-i putirtem dang Ukraine madak takok angutsü atema anogo shia sarasademang, ta tuyua liasü.

Russia Orthodox Arogo nung tongti, Patriarch Kirill-i

Russia-i Ukraine amakba ya pusemer aser pai züngsemtem dang anogo shia linük Tir, Vladimir Putin atema sarasademjang ta mepishir.

Tongti putir, Kirill-i Russia nunger sepaitem danga, nenoki taküm tenla agütsüba ajanga temenen ajak shidoker, ta ashi.

Ano külen Russian Orthodox Arogoi "To Live is to Serve the Motherland" ta ser kaketi ajanga adokogo. Iba kaketi ajanga tanurtem dang pei linük meima sepaitem den longjemer raratsüji pei teinyaktsü mapa lir, ta ajungshir.

Moscow Patriarchate indang website nung shia aliba agi, iba kaketi nungji Russia nunger shin otem, Lai tekongtem aser Orthodox Arogo nung putirtemi tasüaaittsü ajungshiba otem densema lir.

Tawa Russian Orthodox Arogoi Ukraine anema 'Holy War' ayongzükba document ka sangdongba sülen Ukraine nung Arogotemi longjemer Russia Orthodox Arogo aija liasü.

Ukraine nung Arogotemisa alima nung Khristan organisations ajak dang alima

'map' nungi Ukraine samatsütsü merangba ya ajaki aitsütsüla, ta mepishia liasü.

Conference of European Churches den Ukraine nung Roman Catholic aser Orthodox lenirtemisa sangdong ka ajanga World Council of Churches International tentettem danga iba document ji aitsütsü aser parnok pusemertem anema inyaktü ayongzük.

Ukrainian Orthodox Church (OCU) nungi Metropolitan, Epiphany (Dumenko)-i, "Russia-i Ukraine anema raraba ya temeshi rara masü. Russia-i Ukraine amakba pusemertem (Russian Orthodox Arogo) ji Tsüngrem tenzükertem masü saka satan tenzükertem," ta aitsü.

"Russian Orthodox Arogoi iba ama Holy War ayongzükbaji Khristan tangatetbatem den mapet. Russia nung Orthodox Arogoi shidakba agibo iba rara anema ola adoktsüla saka iba rara pusemer. Sepaitemi tashiyim amshia rarabaji evangelical tesayuba den mapet," ta paisa metetdakja liasü.



### AO OSHI ANGAZÜKDAK: TANÜ ANGAZÜKTSÜBA OJANG



#### Süngtep

(n) lenmang atang nung süng agi jenjangpong yangluba ( wooden steps on soil path)

\* Alu lenmang nung aluyimertemi süngtep layonga ao.

#### Süngti

(n) süng tulu (big tree)

\* Yim among nung süngti wazüka ayur.

### OLONG PAITEP # 6793

	1		2			3		4		5
6									7	
					8		9			
			10							
11										
				12						
13		14		15						16
17										18

#### TIPLIN

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Repranzük
- 10. Tasola
- 11. S \_\_\_\_\_
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

#### LANGTSÜNGLEN

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. \_\_\_ hi
- 16. Akümüli nungi pilar

### OLONG PAITEP # 6792 TELANGZÜBA

#### TIPLIN :

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen, 14. Ola,
- 16. Talak, 17. Mazük.

#### LANGTSÜNGLEN :

- 1. Tenükjang, 2. Luden, 3. Kiooktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

## NAI-A YA METETTER MA

Association of Dermatologists, Venereologists and Leprologists



Indian Association of Dermatologists, Venereologists, and Leprologists (IADVL) ajanga ghonda 24 nung dermatological disease awareness atema tezüngzüktep teimtiba agiogo. IADVL-i iba campaign ya May 5 aser 6 anogotem inyaka liasü aser linük kübok doctors nungi 9,405 pledges tashi angu. Guinness World Record (GWR) yanglutetba osang ya May 18 nü IADVL headquarters, Delhi nung sangdonga liasü.

Iba sentong indang alizüing ya India nung doctors 17,000 tashi online ajanga longjemmer dermatological diseases indang osang prokshiba nung yariteptsüba atema liasü. Iba awareness campaign ajanga IADVL-i dermatological conditions aser doctor temi diagnosis & treatment asüba osang prokshio.

## NIA-i nisung shibelener tetsüdi Hannan Mia puogo



**Agartala, May 20, 2024 (Agencies):** Special national investigation agency (NIA) telok kati "most wanted" human trafficker Hannan Mia (40) puogo.

Hannan Mia ya international human trafficking aser tanga ozüing alema inyaksangshiba atema tai tonglokja lir.

Züngsem 3 agi akümba National Investigation Agency (NIA)-i Tripura nung Hannan Mia apu aser Guwahati-i anir ogo.

Bishalgarh Police Station nung Officer-in-Charge Rana Chatterjee-i anir Deobarnü

special operation ka inyakdang Mia apu.

NIA-i Hannan Mia ya 'most wanted criminal' ta züngsema liasü ta Rana Chatterjee-i ashi.

"Pa apuba atema Rs 1 lakh senpet agütsütsü ta NIA-i nangzuka liasü. Osang tejangja ka nung ajemdaker onoki special operation ka inyakdang Mia apu.

Pai international human trafficking nung shilem agiba onoki tsüingsü bushitetogo aser pai tanur tetsürtem teküp ayokba maparen nung shilem agidaksütsü atema shibelena liasü" ta Chatterjee-isa ashi.

"Mia-i taila Indian documents

yanglu aser ozüing alema mapa balala inyak. Pa aputsü atema NIA-ia operation ka tenzük saka parnoki onok teyari meshi" ta paisa ashi.

Pa apuba sülen Tripura Police-i NIA nem osang sangoktsü aser Guwahati nungi NIA ketdangsür 3 arur Mia okadaki anir ao. Pa special NIA court ka tsüingdangi anir aotsü atema okadaki anogo 4 transit remand temelaba agütsüogo.

"Tanü NIA ketdangsürtemi Hannan Mia Agartala nungi Guwahati nung special NIA court-i anir ogo" ta Chatterjee-isa metetdaksü.

## Manipur nung Prepak aser UNLF-P telungpurtem apu

**Imphal, May 20, 2024 (Agencies):** Manipur Police-i Hombarnü People's Revolutionary Party of Kangleipak (PREPAK) züngsem 3 den mobile phone 3 aser Rs 1.9 lakh puogo.

Imphal kübok Thangal bazaar nung tashiyim agi sen saruba osang ka angazükba sülen police-i telungpurtem mita aotsü tenzükogo.

PREPAK züngsem asem ya Konthoujam Kumar Singh (46), Ankur Mahawar (40) aser Naveen Mahawar (48) nunger ta

jangjaogo.

Par asem Chief Judicial Magistrate Imphal West tsüingdangi anir ao aser May 24 tashi police ket nung ayutsü temelaba agütsüogo.

PREPAK züngsem asem den non-locals ana dena tesüiba hopta aika Imphal nung Prepak tenüing nung tashiyim agi sen sarua senzü ta osang kar angazük.

Manipur Police-isa United National Liberation Front - Pambei (UNLF-P) züngsem ka den prangpong-injang puogo. Deobarnü Imphal West

district police aser Manipur police commando unit külemi Mayang Imphal road nung mita aodang telungpur apu.

UNLF (P) züngsem ya Asem Nabachandra Meitei (41) ta jangjaogo. Pa ket nung .32 Pistol ka den magazine aser injangtem ngutet.

UNLF (P) ya Centre aser state sorkartem den yimjung olemtep tagidak lir. UNLF (P)-i Nongpok Sanjenbam yimtsüing nung 'Kathokhrabasingee Ningsing Numit' (Martyrs Day) amongba sülen anogo ka lir pa apu.

## Meghalaya nung drug addicts 2.5 lakh lir: Minister Lyngdoh

**Shillong, May 20, 2024 (Agencies):** Meghalaya nung drug addicts aika akümba atema tebilemtsü abener ta social welfare minister Paul Lyngdoh-i ashi.

Meghalaya nung tetsür aser tanurtem dena drug addicts 2.5 lakh shi lir. Nütsüing yongsük lakh 35 shi aliba state ka nung drug addicts 2.5 lakh alibaji tebilemtsü tulu lir ta pai ashi.

Mawlai Town Dorbar-i anti-drug campaign tenzükba nung

yariteptsü atema Meghalaya sorkari second instalment ama Rs 15.65 lakh agütsüogo.

Meghalaya nung sobaliba reju kati drug addicts anepalutsü atema mapa mezüing inyakbaji Mawlai Town Dorbar-i inyakba ya asütsü.

Tongtipang entry points nung Anti-Narcotic Task Force (ANTF) akangshitsü aser ibaji talisa East Jaintia Hills district nung asütsü ta Minister Lyngdoh-

i ashi. ANTF mapa tajungba akümtsü aser nübo teimba bendenlooktsü. State police aser home guards nung nübo teimba renlooktsü imlar ta paisa ashi.

DREAM project ajanga Meghalaya home department nem senotsü agütsütsü aser iba ajanga parnoki local police departments aser Village Defence Parties (VDPs) dena anti-drug programs ayonga agitetsü, ta Lyngdoh-isa metetdaksü.



Mizoram kübok Siaha district nung Assam Rifles-i Chin Resistance Force (CDF) züngsem ka apuba sülen agiba noksa angur. Iba nisung yagi injang aser osettem bener liasü aser Tuipang yimtsüing nung apu. Assam Rifles-i Tuipang road junction nung Mobile Vehicle Check Post (MVCP) mendanger atadang Kenbo motorcycle ka nung CDF züngsem ka mener aruba sota reprangdang injang aser osettem bena aliba angu.



# US-i Niger nungi sepaitem ajak anientsü renemer

Washington, Monupii/May 20 (Agencies): Niger nung military sokari tetuyuba agütsüba sülen ita pezü tsüingda sepaitem ajak anientsü ta United States-i metetdaksüogo.

Niger-i taoba ita Washington dang parnok indang sepaitem anientsü tetuyuba agütsü, aser US nung sepaite 1,000 shi aliba ya ozüing alema ta ashi. Military shirnoki taoba küm sorkar atsünga liasü parnoki France nema kasa tetuyuba agütsü aser parnok tang Russia den tesendaktep akangshiba mapang ka lir.

US nung sepaitem Niger nungi anin tenzükogo, ta Pentagon aser Nigerien defence ketdangsürtemi Deobarnü külem sangdong ka ajanga metetdaksü. US nung sepaitem ya temonuba agi September 15 nü tashi nungbo anientsü sentong renema lir.

Taoba küm military-i sorkar matsüing tsüingda Niger ya anüolen aliba linüktem den

tesendaktep kanga junga liasü aser Sahel tesem nung telungpurtem den raraba nung Washington densema liasü.

Niger indang defence ministry aser US Department of Defense na anogo pongu senden amenba sülen tenanzüktepbba tasen ka yanglua liasü, kong US nung sepaitem Niger toktsür mao tashi teküzmükba kübok toktsütsü tenanzüktepbba agia liasü, ta kasa sangdong ajanga metetdaksü.

"Niger nungi America nung sepaitem aninba ajanga United States aser Niger na terenlok balala asoshi inyaktepa aruba nung mekongshitsü. Maneni tarutsü nung bilateral tesendaktep asoshi Niger aser United State naprongla tanga benoka aliba diplomatic dialogue atema bendanga agütsür lir," ta kasa sangdong ajanga metetdaksü.

US nung sepaitem aser hadir karbo Niger toktsür ao

tenzükogo, ta military ketdangsür tejen kati Reuters aser Associated Press news agencies dang ashi.

US sentongji sepaitem ajak manin tsüingda lethal, hazardous mesüra classified equipment tem ajak agintsü liasü, saka item ya tayimtsü ajanga bener aotsü atema senotsü kanga intoktsü, anungji Nigeria military nemang toktsütsü akok, ta ketdangsür yagi ashi.

Parnokisa, taoba küm ter tashi kiralongrar anema raraba mapang Niger ya US asoshi teyari tulu liasü aser maneni temelener ka bushidar, ta ashi.

Niger nung military yimsüsürtemi 2023 küm July ita sorkar atsünga liasü.

Iba sülen ita ishika dang lir military sorkari France nung sepaitem dang linük toktsür aotsü tetuyuba agütsü aser iba melen security dak sendakba nung teyari asoshi Russia indang mercenary group Wagner dangi meyipa liasü.

# TASOBA KÜM 75 AJUNGBA



Tasoba Anogo : 21 May 1949

Temeim Obala Wb. **IMKONGWATI JAMIR** (Asangma), iba alimai arur küm 75 tashi abensaa onok akümdong tajung aser len sayur ka ama tanü tashi arishi moatsü nung Tsüngrem tenüing asanger. Maneni obala nem arishi talang den anema aliba moajangma ta onok sarasadem. Oba onoki na kanga meimer aser nü temeim asoshi kanga pelar.

~Temeim Chirnur, In laws & Grand Children.

# Helicopter tsükokdak Iran Tir Ebrahim Raisi asüba jangjaogo



Tehran, Monupii/May 20 (Agencies): Azerbaijan arütsü anasa tenemlen helicopter ka tsükokba nung Iran Tir Ebrahim Raisi süogo, ta ketdangsürtem aser state media ajanga Hombarnü ashi.

Mapang talangka nungi Raisi ya Iran indang Supreme Leader Ayatollah Ali Khamenei melentsü sempet aser teimla lir ta takzüa arua liasü.

Tir Raisi, Foreign Minister Hossein Amirabdollahian aser dangar trok mena aliba helicopter rongsar aliba ya tzüingsang kanga mejungi aonung tepiyong bushir Hombarnep ngutet.

Khen atema First Vice President Mohammad Mokhber-i tir inyaka alitsü ta Supreme Leader Khamenei-i metetdaksüogo.

"Anogo pongu nüburtem mang ayimtsü sangdonger aser teti meima aliba Iran nüburtem den asükhü lemsateper," ta Khamenei-i sangdong ka nung ashi. Mokhber ya Raisi ama Khamenei den tesendaktep tajung lir.

Iran indang constitution nung tir tasen ka atema election ya

anogo 50 tsüingta agitsü shia lir.

Tzüsü agi lungbanger aliba tenem len iba helicopter teraksa prokshia aliba aser Red Crescent workers temi stretcher nung tasü mang ka sü agi meyibanger bener aoba noksa tem nguogo. Iba helicopter nung mena alir ajak süogo, ta Iran ketdangsür kati shia liasü.

Iba helicopter tsükokdak Raisi den Foreign Minister Hossein Amirabdollahian, East Azerbaijan Province governor Malik Rahmati, East Azerbaijan nung Iran supreme leader indang representative Ayatollah Mohammad Ali Al-Hashem, Raisi indang guard team tekolakba Sardar Seyed Mehdi Mousavi, pilot Colonel Seyed Taher Mostafavi, co-pilot Colonel Mohsen Daryanush aser flight technician Major Behrouz Ghadimi nungertem asü.

Amirabdollahian asüba sülen Deputy Foreign Minister Ali Bagheri Kani ya acting foreign minister shimogo, ta Iran sorkar meyong IRNA news agency ajanga ashi.

Raisi indang convoy nungya helicopter asem liasü aser

tanüingba ana ya junga pei tatongtsü tesem tongogo.

Deobar nikongdang East Azerbaijan province kübok Jolfa region nung tzüsü agi lungbanger aliba tenem ajanga aodang Raisi mena aliba helicopter den osangtsüsang magiteti akumba sülen Iran ketdangsürtemi osang prokshi.

Raisi ya Azerbaijan den arütsülen nungi meyipa shilangba mapang helicopter ya Tabriz north tsütsü Varzeqan region nung tsükok.

Raisi ya Azerbaijan arütsülen Qiz-Qalasi Dam semzüktsü atema oa liasü. Azerbaijan Tir Ilham Aliyev-i Deobarnep Raisi den ajurutepa liasü aser tena tatem salem shiteper mapang tatsüka lir iba osang ya angashi.

US-i yangluba Bell 212 helicopter ya kechi tai ajanga tenem kolak anasa tsükokar mejangja.

Rescue team tem am mang tepiyong rer aser yipru aita jajar Hombarnep iba lendong atalokba tesem tongteta liasü.

Iran linük telungzük nung yimtenren, sobaliba aser rongsenketzüing tsütsü jenjang mejungi akumba mechi nüburtemi ketdangsürtem dang mepelai akumba mapang ka nung iba lendong ya ataloker. Ano mangatetep aliba nuclear sentong aser Ukraine nung raraba mapang Russia den mitkar tsütsü tesendaktep tajungba akumba ajanga linük balalai Iran yimsüsür dang mepelar.

Arishi küm 63 tain Raisi ya 2021 küm tir shimba sülen pai morality laws tali akangshitsü totuyuba agütsü, sorkar anema longkak aiterem pua merenshi aser alima nung tashi tail linüktem den nuclear ken o kanga sashia jembia arua liasü.

(Maneni tapak 8 nung...)

# Nepal PM Prachanda-i vote of confidence takok nguogo



Kathmandu, Monupii/May 20 (Agencies): Hombarnü Nepal Parliament nung vote of confidence agiba nung Ato Kilonser Pushpa Kamal Dahal 'Prachanda'-i takok nguogo, koba pa asoshi PM menden nung menden ita 18 tsüingta pezüben buba alitsü.

Iba vote agitepba nung Opposition Nepali Congress-i vote magütsü aser yimyim ayima liasü.

Arishi küm 69 tain Communist Party of Nepal (Maoist Centre) ajanga züngsem 275 aliba House of Representatives nung vote 157 nguteta liasü.

Iba vote agütsüba maparen nung ozüing yanglur 158-i shilem agia liasü. Opposition Nepali Congress-i iba voting nung shilem magi aser Deputy Prime Minister aser Home Minister Rabi Lamichhane anema yimyim ayima liasü, shibai cooperative funds meshidak amshiba tai tonglokja lir. HoR züngsem ka telok kata nunga maden.

Parliament nung Prachanda-i vote timba ngua takok angur, ta Speaker Dev Raj Ghimire-i sangdong.

Taoba hopta coalition

partner Janata Samajbadi Party (JSP)-i par sorkar nungi ainshiba sülen iba vote ya agitsüsa akum.

Vote of trust takok angutsü asoshi sorkari vote tajemba agi 138 nungdaker. Lamichhane-i ochimashi mapa inyakba bushisüngdangtsü atema Parliamentary probe committee ka tentetang ta Nepali Congress-i akhangba ajanga voting tera menur tenzüktsüsa akum.

2022 küm December ita nungi ato kilonser inyaka arudang House nung Prachanda-i vote of confidence pezüben buba agir alitsü.

Ruling coalition nung dena aliba party ainshiba sülen ato kilonseri vote of confidence agitsüla ta constitution nung shia lir.

March 13 nüa vote of confidence agiba nung Ato Kilonser Prachanda-i takok ngua liasü.

Yaküm tir election nung main opposition party indang candidate yariba mechi mangatetep adoka taoba ato kilonser KP Sharma Oli-i aniba CPN-UML coalition nungi ainshiba sülena floor test khen agia liasü.



### WABC Level-1 Program nung coach 8 graduate süogo



**Dimapur, Monupii/May 20 (TYO):** Basketball Federation of India (BFI) aser Nagaland Basketball Association (NBA) na den longjemer FIBA Regional Office-Asia-i ayongzüka WABC Level 1 coaching program ka Dimapur nung March ita agiogo.

Iba inyakyim ya FIBA Regional Office-Asia-i, mentors aser coach mapa inyaktsü jangrartem anitetsü meranga aruba nung shilem ka lir aser iba

program nung nisung 15-i shilem agi kong Nagaland nunga nisung 8-i densema liasü.

Hopta ka tepeyong ayongzüka agiba sentong nung classroom sessions den practical on-court training densema liasü. Theory aser practical na meyokteper tangazükba agütsüba ya coach tem parnok mapa nung tedangshiba kümdaktsütsü asoshi parnoki nungdakba tasa aser shisatsütem agütsütsü

asoshi lir.

Nagaland nungi coach 8 ya Salew Kadete, Chumbenthung Humtsoe, Sharman Lama, Reena Rai, Imyangluba Lemtur, Marshal Pashel, Rolio Z Lohe, aser E Rainbow Patton nunger liasü aser parnoki course takok ngua agiogo. Temetetsü kaji Salew Kadete, Chumbenthung Humtsoe, aser Sharman Lama nungeri result tajung ngutetogo aser iba ajanga parnok bendanga agütsür aliba aser parnok dak sempet aliba sayur.

Nagaland Basketball Association-i coach temi takok tajung anguba atema kanga pelaba lemsatpogo. "Parnoki takok tajung ngutetba atema onok kanga nema adnger aser Dimapur nung iba tongtibang sentong ayongzüka katsüba atema FIBA Regional Office-Asia aser BFI dang kanga pelar. Iba course ajanga tasa aser shisatsü anguba ajanga tarutsü nung local aser national jenjang nung basketball asaya coaching atema tamendakdak takang ka yangertsütsü ta amanger," ta NBA-i ashi.

World Association of Basketball Coaches (WABC) coaching clinic ayongzüka

katsüba ya India nunger basketball coaching tamendakdaka akangshitsütsü asoshi kanga tongtibang lir, aser iba ajanga national aser regional jenjang nung asaya tarutsü tajungba kümdaktsür.

### District level pre-subroto asayamung Tseminyu nung asayatsü

**Dimapur, Monupii/May 20 (TYO):** District Sports Officer Tseminyu, Zhopovi Zechu-i sangdong ka ajanga Tseminyu District kübok Schools/Institutions ajak dang District Sports Office Kohima-i tebur U15 football asayartem atema pre-subroto asayamung ka ayongzüka asayatsü ta metetdaksüogo. Asayartem ya 2010 küm

January 1 nü mesür iba sülen asortem asütsüla. Asayamung ya May 30 aser 31 nü RSA ground, Tseminyu nung asayatsü. Iba asayamung nung shilem agiba asayartem ya pei school nungi dang asütsüla.

Asayamung nung shilem agiba schools/ Institutions temi asayartem indang birth certificate/Aadhar card original bener arutsüla.

Tseminyu District kübok iba asayamung nung shilem agitsü jangraba schools/Institutions temi parnok iba asayamung nung shilem agitsüba osang May 20 nungi 25 nü tashi nung districtsportsofficerkohima@gmail.com dangi email sütetsü mesüra iba number # 8259031373 nung tongteprateptetsü, ta kasa sangdong ajanga metetdaksü.

### Malaysia Masters atema PV Sindhu renemer

**Monupii/May 20, 2024 (Agencies):** Mapang tatsüka masayai lir Paris Olympics nung shilem magi tsünga P V Sindhu-i anir India nunger asayartem Malaysia Masters badminton tournament nung shilem agitsü. Iba asayamung ya Kuala Lumpur nung Mongolbarnü nungi tenzüka asayatsü.

Sindhu, shiba taoba mapang world champion ka lir, la Uber Cup aser Thailand Open na nung shilem magiba sülen tang iba asayamung nung shilem agitsü renema lir.

Hydreabad nungi arishi küm 28 tain asayar ya taoba küm October ita temekok yiruba sülen junga masayateti arudar. La taneptsü anguba sülen asaya tenzük saka asayamung trok

nung ana nung dang quarterfinal tonga asayaogo.

Lai tatema 2022 küm Singapore Open koker lir. La taoba küm Spain Masters nunga final tonga asaya saka takok mongutet. La Malaysia Masters nung mezüngbuba asaya Scotland tsür Kirsty Gilmour den asayatsü.

Tetsürtem rongnungi temaba jenjang nung asayaba asayar An Se Young, Chen Yu Fei, Akane Yamaguchi aser Carolina Marin nunger ajak iba asayamung nung shilem magitsü, anungji Sindhu lanur asayartem den la terenemshiba tendangtsü atema yongya ata alitsü.

Ashmita Chaliha, Aakarshi Kashyap aser Malvika Bansod nunger ajak iba asayamung

nung asayatsü renema lir.

Tebur kija asaya nung India nunger rongnungi Kiran George kija lir aser pa mezüngbuba asaya Japan nunger asayar Takuma Obayashi den asayatsü.

Thailand Open champions Satwiksairaj Rankireddy aser Chirag Shetty nati iba asayamung nung shilem magitsü atema teletmetba agiogo anungji Krishna Prasad Garaga aser Sai Pratheek K na asoshi tena sempet sayatsü asoshi iba asayamung ya maongka tajung ka asütsü.

Tarep temeyoktep asaya nung B Sumeeth Reddy aser N Sikki Reddy na aser Sathish Kumar Karunakaran aser Aadya Variyath nungeri shilem agiba agütsü.

### World Para Championships: Deepthi-i 400m nung gold angu



**Monupii/May 20, 2024**

**(TYO):** Kobe (Japan) nung tang asaya aliba World Para Athletics Championships nung Hombarnü India tsür Deepthi Jeevanji-i, tetsür 400m T20 category race nung alizüng second 55.07 nung tongteta gold medal angu aser world record ka yanglua liasü.

Taoba küm America tsür Breanna Clark-i Paris nung kasa asaya nung asayaba mapang alizüng second 55.12 nung tonga otsü tasen yanglur aliba Deepthi-i ajatetogo.

Kasa asaya nung Turkey tsür Aysel Onder-i alizüng second 55.19 nung tongteta lia silver angu aser Ecuador tsür Lizanshela Angulo-i (56.68 seconds) bronze medal ngua liasü.

Deobarnü qualifier asayaba mapang Deepthi alizüng second 55.18 nung tongteta Asain record ka yanglu aser final atema

qualify süa liasü.

T20 category ya intellectual impairment aliba asayartem atema lir.

Hombarnüsa tebur F56 category discus throw nung Yogesh Kathuniya-i silver medal ngua liasü. Pai discus ya meter 41.80 merepa liasü.

F56 category ya field event tem nung meren asayaba asayartem atema lir. Asayar shirnok tetsüng rangtoker aser tongtoret yiruba ajanga mener dang asaya parnok iba category nung asayar.

Iba asayamung nung India nunger asayartemi tang tashi nung gold medal 1, silver medal 2 aser bronze medal 1 ngur lir.

Deobarnü Nishad Kumar (T47 high jump) aser 200m runner Preethi Pal (T35 200m race) nati silver aser bronze medal ngua liasü.

Iba asayamung ya May 25 nü tashi asayatsü.

### BENDANGLI OSANG : Tapak 7 nungi...

#### Helicopter tsükokdak Iran Tir Ebrahim Raisi...

Iba lendong atalokba osang prokshiba sülen Saudi Arabia, Syria, Egypt, UAE, Turkey, Russia, China, EU, NATO, India, France aser linük aikati Iran den asükhu lemsatpogo.

Syria aser Lebanon nung asemnü Raisi mang ayimtsü sangdong.

China Tir Xi Jinping-ia asükhu osang ka Iran den lemsatpog, kong China-Iran tesendaktep nung Raisi-i tongti shilem agiogo, ta shia liasü.

"Tia makai pa asüba ya Iran nübürtem asoshi takoksa tulu aser China atema tembar tajung ka samaogo. China sorkar aser nüburi linük ana

tsünga tesendaktep kodanga mamadoktsü aser akokba lenmang ajak nung yariteptsü renema lir," ta pai ashi.

Russia Tir Vladimir Putin-i Iran indang interim president Mohammad Mokhber den phone ajanga jembiogo aser tarutsü nunga linük ana tsünga tesendaktep junga alitsü indang jemi, ta Kremlin-i ashi.

Hombarnü India Ato Kilonser Narendra Modi-ia Iran tir Ebrahim Raisi asükhu lemsatpog liasü.

Iran tir nem akhum agüja Mongulbarnü India tesem ajungalen mang ayimtsü, ta India sorkari sangdongogo.

### BILEMDANGANG

"Telongjem ajanga tamakoktsü ajak kokteter."